

Prome encuentro cu bisiñanan di Isla di Oro ta positivo y productivo



ORANJESTAD – Cu e proposito di mantene un comunicacion habri entre desaroyador y habitantenan rond di proyecto Isla di Oro, a tene recientemente un encuentro caminda a trece dilanti e ultimo avancen.

Aki bisiña directo di e area tabatin oportunidad di tende stret for di boca di esunnan encarga di control di plaga, siguridad y naturalmente e construccion di e boutique hotel riba su mes. Habitantenan tabata contento di por a duna nan comentario y haci pregunta pa haya contestanan di biala y concreto. Na mesun momento, e encuentro a sirbi pa aclaria rumornan robes purbando di lanta cabes.

Isla di Oro lo ta un proyecto unico den su estilo pa e region Caribense y cu un potencial enorme. Grupo Isla ta compronde totalmente e

preocupacion cu tin pa mantene e flora y fauna di e area en cuestion.

P'esey mes, un prioridad ta pa cumpli cu e rekisitonan internacional pa cu proteccion di medio ambiente, segun e prestigioso programa di certificacion LEED. Estudionan di impacto ambiental ta den proceso y ta trahando cu diferente compania local, y miho ainda, di Pos Chikito mes, pa

atende e diferente retonan. E proyecto ta consisti di 62 bungalows traha cu material natural den un proceso di construccion cu tin un impacto minimo. E concepto di 'Endless Privileges' di Zoetry ta consisti di un combinacion di servicio den cual ta involucra companianan local di car rental y tours. Tambe tin un Dine Around Program den cual e restaurantnan di e area di



Spaans Lagoen, Pos Chikito y Savaneta ta bay forma parti di dje. Fuera di esey, e restaurant den e propiedad ta bay ta habri pa mercado turistico den su totalidad y publico local en general. E intencion di parti di e esunnan encarga cu e proyecto ta pa sigui traha di cerca cu e habitantenan pa asina yega na e miho producto final posibel pa ambos partido. Di mesun manera, e compania ta den

comunicacion cu instancia publico y fundacionnan local cu ta regarda cu maneho di medio ambiente pa percura cu e preocupacion y recomendacion di cada un ta haya su debido oido den e ehecucion di e proyecto.

E reunion aki ta e prome di mas cu tin programa den e proximo lunanan pa asina sigui tene un y tur na altura di kico ta pasando y kico ta bay haci. E reaccion di parti di e bisiñanan tabata uno di gran interes, pero tambe sumamente positivo. Tabatin preguntanan, pero tambe sugerencianan valioso cu ta bay tuma den consideracion. E grupo aki di bisiña ta contento di mira cu finalmente tin un luz den horizonte pa e bario di Pos Chikito y cu ta un iniciativa cu ta beneficia no solamente nan como habitante, pero tambe comercio den e area y Aruba en general. □



65 aña di bida matrimonial

ORANJESTAD - Dialuna 9 di november 2015 cu a pasa Paulus y Carmen Rasmijn a cumpli 65 aña di feliz bida matrimonial.

Nan a habri e dia cu un Sacrificio di Misa cu a tuma luga na misa Sagrado Curason di Hesus na Savaneta y despues a celebra



den famia, hunto cu yiunan y nan casa, rumannan y nietonan.

Di sorpresa Mariachi a bin duna nan un dushi serenata pa cera nan dia festivo di nan Aniversario. □

